

Morning Regional Dogri News Bulletin, 29th August 2024

मार्निंग डोगरी न्यूज़ बुलेटिन,

समं. 09-20 Hrs

<><><><><><>

एह आकाशवाणी जम्मू ऐ, बड्डलै खबरें च तुंदा सुआगत, पैहले खास-खास खबरें कन्नै में अमिलाषा शर्मा।

Headlines

1. जम्मू कश्मीर च होने आले विधानसभा चुनावं दे दुए गेड़ दी अधिसूचना अज्ज जारी कीती जाग जेहदे च जम्मू खित्ते दे 11 विधानसभा हल्के बी शामिल न।
2. विधानसभा चुनावं दे पैहले गेड़ लेई 244 मेदवारें चुना मैदान च न। अधिकारिणं 35 नामांकन पत्रें गी खारज करी दित्ता ऐ।
3. आतंकवादिणं दी संदिग्ध नकलो हरकत परैंत सुरक्षाबलें राजौरी ते खवास च तपाशी अभियान शुरू कीता।
4. मुख्य भरै च अज्ज राश्ट्रीय खेड्ड दिवस मनाया जांरदा ऐ। पेरिस च पेरालंपिक 2024 खेड्डें दी शुरूआत होई गई ऐ।

हून खबरें दी तपसील कन्नै प्रोमिला जम्वाल।

<><><><><><>

JK 2nd Phase

जम्मू कश्मीर च दुए गेड़ दे विधानसभा चुनावं दी अधिसूचना अज्ज जारी कीती जाग। साढ़े जम्मू संवाददाता मूजब इस गेड़ च गांदरबल, श्रीनगर, बडगाम, राजौरी, पुंछ ते रियासी जिले च 26 विधानसभा हल्के च वोट पोआए जांगन। नामांकन दर्ज करने दी खीरी तरीक 5 सितम्बर ऐ जदके नामांकन पत्रें दी जांच अगले दिन कीती जाग। मेदवार जेगर चाहन तां 9 सितम्बर तगर अपनी मेदवारी परताई सकदे न। इस गेड़ लेई मतदान 25 सितम्बर गी होग। जम्मू खित्ते दे जिनें 11 विधानसभा हल्के लेई अधिसूचना अज्ज जारी कीती जाग। उंदे च गुलाबगढ़, रियासी, श्री माता वैष्णो देवी, कालाकोट-सुदंदबनी, नोशेहरा, राजौरी, बुद्धल, थन्नामंडी, सुरनकोट, पुंछ-हवेली ते मेंढर शामिल न। विधानसभा हल्के दी नमें सिरेया हद्दबंदी दे बाद प्रदेश च असैंबली हल्के दी गिनतरी 83 थमां 90 करी दित्ती गेदी ऐ। इत्थें चुनावं त्रै गेड़ च होग। पैहले गेड़ तैहत 18 सितम्बर गी 24 हल्के पर, दुए गेड़ च 25 सितम्बर गी 26 हल्के च ते त्रैए गेड़ तैहत पैहली अक्तूबर गी 40 विधानसभा हल्के च वोट पाए जांगन। वोटें दी गिनतरी आला कम्म 4 अक्तूबर गी कीता जाग। जम्मू कश्मीर च कुल 87 लख 9 जहार मतदाता न, जिदे चा 44 लख 46 जहार मर्द, 42 लख 62 जहार महिला, 3 लख 71 जहार पैहली बारी वोट पाने आले मतदाता ते 20 लख 70 जहार युवा मतदाता न।

<><><><><><>

Security Phase 1

केन्द्र शासत प्रदेश जम्मू कश्मीर पैहले गेड़ तैहत 24 विधानसभा हल्के च वोट पाए जाने न। पैहले गेड़ लेई भरे गेदे नामांकन पत्रें दी जांच आला कम्म कल होआ। आकाशवाणी जम्मू संवाददाता दी रिपोर्ट मूजब 279 मेदवारें पैहले गेड़ तैहत अपना नामांकन भरेआ हा। नामांकन पत्रें दी जांच मगरा 244 मेदवारें दे कागज पत्रवैध पाए गे। 35 मेदवारें दे कागज पत्रें गी खारज करी दित्ता गेआ। किशतवाड़ जिले च 48 इंद्रवाल विधानसभा हल्के लेई 12 मेदवारें दे कागज पत्र वैध पाए गे, इसै चाल्ली 49 किशतवाड़ हल्के लेई 10 मेदवार दे ते 50 पाड्डर नागसैनी लेई 7 मेदवारें दे नामांकन प. वैध पाया गेआ। डोडा जिले च भद्रवाह हल्के लेई 14 मेदवार डोडा हल्के लेई 11 मेदवार डोडा पच्छम लेई 9 मेदवार चुनावं मैदान च न। रामबन जिले च रामबन लेई 12 नामांकन ते बनिहाल लेई 4 मेदवारें दे नामांकन पत्र वैध पाए गे। मेदवार जेकर

चाहने तां ओह 30 अगस्त तगर अपना नामांकन वापस लेई सकदे न। पैहले गेड़ तैहत् 23 लक्ख 27 ज्हार थमां बद्ध मतदाता वोट पाए दे अपने अधिकार दा इस्तेमाल करगन। इंदे च 5 लक्ख 66 ज्हार युवा मतदाता न। पैहले गेड़ तैहत् मतदान 18 सितम्बर गी होग।

<><><><><><>

DC List

औं दे विधानसभा चुनाएं गी दिक्खदे होई कश्मीर पीपुल्स कांफ्रेंस नै बुधवारें 7 मेदवारें दी पैहली सूचि जारी कीती। पार्टी दे अध्यक्ष सज्जाद गनी लोन होरें इस सूचि गी मंजूरी दिक्ती। पार्टी दे वरिष्ठ नेता अब्दुल गनी होर राफीयाबाद थमां नजीर अहमद लावे कुलगाम थमां आबिद हुसैन अंसारी जादीबल, इरफान मट्टू ईदगाह थमां डॉ. बशीर अहमद उड़ी थमां आसिफ लोन बारामुला थमां ते हमजा लोन गुरेज थमां चुनां लड़गन।

<><><><><><>

PM-Pragati Meeting

प्रधानमंत्री नरेन्द्र मोदी होरें कल केन्द्र ते राज्य सरकारें दी भागीदारी कन्नै असरदार शासन बवस्था ते बेल्ले सिर कार्यक्रमें गी लागू करने दी सूचना ते संचार तकनीक पर आधारित मंच प्रगति दी 44मीं बैठक दी प्रधानता कीती। श्री मोदी सरकार दे त्रीए कार्यकाल च लाई गेदी एह प्रगति दी पैहली बैठक ही। बैठक दरान श्री मोदी होरें इस गल्ले पर जोर दिक्ता जे सरकार दे हर इक अधिकारी गी संवेदनशील बनाया जाना लोड़चदा ऐ। उनें आखेआ जे परियोजनाएं च विर कन्नै नां छड़ी लागत बघदी ऐ सगुआं आम लोक उस परियोजना दे मेदें मताबक लाह थमां बी वंचित होई जंदे न। प्रधानमंत्री होरें आखेआ जे 'एक पेड़ मां के नाम' अभियान परियोजना विकास करदे बेल्ले पर्यावरण दी राक्खी च मदाद करी सकदा ऐ। गल्लबात दे दरान प्रधानमंत्री होरें अमृत योजना दे दुए गेड़ ते जल जीवन मिशन कन्नै सरबंधत सार्वजनिक शकैतें दी बी समीक्षा कीती। मोदी होरें मुख् सचिवें गी अमृत योजना दे दुए गेड़ तैहत् जारी कम्में दी निजी तौर पर निगरानी करने दी सलाह बी दिक्ती।

<><><><><><>

Smart Cities

केन्द्रीय मंत्रिमंडल नै देसा च औद्योगिक परिदृश्य गी बदलने लेई राष्ट्रीय गलियारे विकास कार्यक्रम तैहत् 12 नमें ग्रीनफील्ड औद्योगिक स्मार्ट सिटी गी मंजूरी देई दिक्ती ऐ। नमीं दिल्ली च कैबिनेट दी बैठक मगरा मीडिया गी संबोधत करदे होई सूचना ते प्रसारण मंत्री अश्विनी वैष्णव होरें आखेआ जे इनें औद्योगिक क्षेत्रें च कुल 28 ज्हार 602 करोड़ रपे दा अंदाजन निवेश होग। उनें आखेआ जे इनें परियोजनाएं कन्नै 10 लक्ख सिद्दे तौरा पर ते 30 लक्ख अप्रत्य तौरा पर रोजगार पैदा होंगन। केन्द्रीय मंत्रिमंडल नै 234 नमें शैहरें च 7 सौ 30 प्राइवेट एफएम चैनलें लेई ई-नीलामी करने दे प्रस्ताह गी मंजूरी देई दिक्ती ऐ। इस गैह दा मकसद मातृभाषा च मकामी सामग्री गी बढ़ावा देना ते नमें रोजगार दे मौके पैदा करना ऐ।

<><><><><><>

UNSC

संयुक्त राष्ट्र महासभा नै सुरक्षा परिषद सुधार चर्चा गी सर्व सम्मति कन्नै अगले इजलास तगर अगड़ा पाने दे पक्ख च मतदान कीता ऐ। भारत दी उप स्थाई प्रतिनिधि योजना पटेल होरें इस फैसले दी चुक्ताचीनी कीती। अंतर सरकारी गल्लबात आली प्रक्रिया च कोई प्रगति नैई हुंदी ऐ तां एहदी वैद्यता ते सार्थकता दे खत्म होने दा खतरा ऐ। महासभा नै 2009 बरे च अंतर सरकारी गल्लबात प्रक्रिया शुरू होने मगरा इटली, पाकिस्तान ते कनाडा सने 12 मुल्खें दे समूह दे विरोध करी औपचारिक गल्लबात गी बार-बार स्थगित कीता ऐ।

<><><><><><>

ते हुन बाकि दिएं खबरें कन्नै अभिलाषा शर्मा।

<><><><><><>

Rajouri Encounter

राजौरी जिले दी खवास तैहसील च संदिग्ध नकलो हरकत दिक्खे जाने मगरा इलाके दी घेराबंदी करियै तपाशी अभियान चलाया जा'रदा ऐ। राजौरी थमां आकाशवाणी संवाददाता नै सुरक्षा अधिकारिए दे हवाले नै जानकारी दित्ती ऐ जे खवास तैहसील दे खैरी मोहरा लाठी धनथाल इलाके च संदिग्ध नकलो हरकत दिक्खी गई जेहदे मगरा सुरक्षाबलें इलाके दी घेराबंदी करियै तपाशी अभियान शुरू कीता। चिरे रातीं तपाशी अभियान दरान गोलीबारी बी होई। तोआई सुरक्षाबलें पुंछ च आतंकवादिएं दी छप्पने आली इक थाहर दा पता लाइयै उसी नष्ट करी दितता ऐ ते इलाके दी घेराबंदी करियै चलाए गेदे तपाशी अभियान असला बी बरामद कीता। पुंछ थमां आकाशवाणी संवाददाता नै जानकारी दित्ती ऐ जे कल संजा सेना आस्सेआ तपाशी अभियान दरान कुदरती गुफा थमां 6 हत्थगोले बरामद कीते गे।

<><><><><><>

JMC Advisory

जम्मू नगर निगम नै लोकें गी सलाह दित्ती ऐ जे गैर-मंजूर कालोनी रीयल एस्टेट परियोजना च प्लाट नेई खरीदन ते निवेश बी नेई करन जिंदी जम्मू नगर निगम सरबंधत योजनाएं गी नगर निगम आस्सेआ मंजूरी नेई थहोई ऐ ते नां गै रीयल एस्टेट अथारिटी च पंजीकृत न। जम्मू नगर निगम दे कमीशनर डॉ. देवांश यादव होर इक सार्वजनिक सूचना राएं लोकें गी आखेआ जे ओह नगर निगम एक्ट 2000 ते सनीफाईड बिल्डिंग बाय लॉ 2021 दा पालन करन ते रीयल एस्टेट रैगुलेरिटी आथारिटी ते जम्मू नगर निगम दी मंजूरी आले प्लाट गै खरीदन।

<><><><><><>

CEO e-Bus

जम्मू स्मार्ट सिटी दे मुख् कारजकारी अधिकारी डॉ. देवांश यादव होरें नागरिकें गी अपील कीती ऐ जे इलैक्ट्रिक बस च कराया दिंदे मौके आलाइन अदायगी आला ते एनईएमसी दा इस्तेमाल करन ते ट्रांसपोर्ट बवस्था गी होर बेहतर ते कारगर बनान। जारी इक ब्याने च जेएमसी दे कमीशनर होर ऑनलाइन अदायगी गी बढ़ावा देने पर जोर पाया। उनें एह बी आखेआ जे बिजन टिकट दे सफर करा'रदे लोकें खलाफ सख्त कारवाई कीती जाग। स्मार्ट सिटी दे सभापतिएं दी हिफाजत लेई उनें लोकें गी सैहयोग करने लेई गलाया। उनें गलाया जे शैहरे च सीसीटीवी कैमरें बी लाए गे न तां जे सार्वजनिक संपत्तिएं गी नुकसान पजाने आलें पर तक्क रखी जाग।

<><><><><><>

DG BSF

बिहार कैडर दे 1990 बैच दे आईपीएस अधिकारी राजविंदर सिंह भट्टी होरें गी केन्द्रीय औद्योगिक सुरक्षा बल सीआईएसएफ दा महा निदेशक नियुक्त कीता गेआ ऐ। तोआई 1990 बैच दे उत्तर प्रदेश कैडर दे आईपीएस अधिकारी दलजीत सिंह चौधरी होरें गी सीमा सुरक्षा बल बीएसएफ दा महानिदेशक नियुक्त कीता गेआ ऐ। चौधरी होर इसले सशस्त्र सीमा बल एसएसबी दे महानिदेशक दे तौर पर अपनियां सेवा देआ'रदे न।

<><><><><><>

\National Sports Day

अज्ज राश्ट्रीय खेड्ड दिवस मनाया जा'रदा ऐ। एह ध्याडा हॉकी दे सब्बने शा शानदार ते बड्डे खडारी मेजर ध्यानचंद हुंदे जन्मदिन पर मनाया जंदा ऐ। हर ब'रे दे ध्याडा 29 अगस्त गी खेड्डे दी महत्ता बारे जोर देने लेई ते भारतीय हॉकी च मेजर ध्यानचंद हुंदे अनमुल्ले योगदान गी चेता नुआने दे कन्नो कन्नी उंदे सम्मान च मनाया जंदा ऐ। युवा मामले ते खेड्डे सरबंधी केन्द्री मंत्री डॉ. मनसुख मांडविया होरें राश्ट्रीय खेड्ड दिवस दे जश्न च हिस्सा लैने दे तौरा पर सब्बने गी बाहर खेड्डने आली खेड्डे च घट्टोघट्ट इक घँटे लेई हिस्सा लैने दा आह्वान कीता ऐ।



Paris Paraolympic

पैरिस च पैरा ओलंपिक्स खेड्डा 2024 दा औपचारिक तौरा पर उदघाटन होई गोआ ऐ। उदघाटनी समारोह दा आयोजनएवेन्यू डेस चैंप एलिसी ते ओहदे मगरा प्लेस डे ला कानकार्ड च कीता गोआ। भारत दी तरफा पैरा एथलीटें सुमित एंटिल ते भाग्यश्री जाधव होरें भारतीय दल दी अगुवाई कीती जेह्डी 12 बक्ख-बक्ख खेड्डे च 84 खडारिएं कन्नै राश्ट्र दे पेरालंपिक इतेहास च अजे तगर दी सारें शा बड्डी टीम ऐ। टोक्यो 2020 पैरालंपिक च नेता सुट्टने च सुन्ने दा तगमा जित्तने आले सुमित एंटिल हुंदे थमां राश्ट्र गी इक बारी परतियै बेह्तरीन प्रदर्शन दी मेद ऐ।



PM-Paraolympics

प्रधानमंत्री नरेन्द्र मोदी होरें आखेआ जे पैरिस पेरालंपिक 2024 च हिस्सा लैने आले भारतीय खडारिएं गी 140 करोड़ देशवासिएं शुभकामनां दित्तियां न। इक सोशल मीडियो पोस्ट च मोदी होरें आखेआ हर इक एथलीट दी दलेरी ते लगन पूरे मुल्ले आस्तै प्रेरणा दे स्रोत्र न। उनें आखेआ जे हर कोई उंदी सफलता आस्तै प्रार्थना करा'रदा ऐ।



